

МЕСЯЦА ОКТЯБРЯ В 23-Й ДЕНЬ.

СВЯТАГО АПОСТОЛА ИАКОВА, БРАТА БОЖИЯ

На Господи, возвах: стихиры на 6, глас 4.

Подобен: Дал еси знамение:

Приидите, память Богобрата почтим священо, о Богомудрии. * Иго бо взем Христово усердно, * Евангелия благодати Его и Царствия проповедник показался, * и Того неизреченное строение уверяет. * Темже им, Всесильне, очищение нам даруй.

Вся огласи вселенныя концы глагол твоих вещание, * имиже просвещаемся добродетелей Божественная ко всякому виду * и наставляеми верно Святыя Троицы к познанию. * Тем молим тя яко иерарха: * молися Иисусу Человеколюбцу спасти души наша.

Издалеча прозри твое жительство, Иакове, * брата тя прия Христос Человеколюбец, премудрый провидец, * Иерусалима священноявленника верна * и пастыреначальника поставляет, * и таинника неизреченная священнодействующа таинства. * Егѡже и ныне моли спастися душам нашим.

Слава, глас 6. Самогласен:

Кровию мучения священство украсил еси, священномучениче апостоле: * на криле бо святилища представ, * Бога Слова проповедал еси, Творца суща всего. * Тем от иудей свержен, * Небесных чертогов сподобился еси, Богобрате Иакове, * Христа Бога моли спастися душам нашим.

И ныне, Богородичен:

Кто Тебе не ублажит, Пресвятая Дево; * кто ли не воспоет Твоего Пречистаго Рождества; * безлетно бо от Отца Возсиявый Сын Единородный, * Тойже от Тебе, Чистыя, пройде, * неизреченно воплощся: * естеством Бог сый, * и естеством быв Человек нас ради, * не во двою лицу Разделяемый, * но во Двою Естеству * неслитно Познаваемый. * Того моли, Чистая, Всеблаженная, * помиловатися душам нашим.

На стиховне стихиры, глас 1.

Подобен: Небесных чинов:

Благочестующих множества, * ныне священный праздник радостно совершающе, * воскликнем вси, верно восхваляюще во псалмех и пениих, * Богобрата днесь и ученика Господня: * присно бо молит спастися нам.

Стих: Во всю землю изыде вещание их * и в концы вселенныя глаголы их.

Еже по плоти Господня желания, мудре, * брат показался еси, * ученик и самовидец Божественных таин, * бегаяй с Ним и в Египте быв со Иосифом, * Материю же Иисусовою: * с Нимиже моли спастися нам.

Стих: Небеса поведают славу Божию, * творение же руку Его возвещает твердь.

Апостольский лик тебе избра * священствовати первее в Сионе святем * Христу Благодетелю, * яко суща Того по плоти сродством и брата, * спутешественника и наследника следов Того, Иакове.

Слава, глас 8:

Началопастыря Христа брат был еси и преемник * и во апостолах знаменит, * еже за Того умрети возлюбил еси * и мучения не устыделся еси, * Иакове славне: * Того моли непрестанно спасти души наша.

И ныне, Богородичен:

Владычице, прими молитвы раб Твоих * и избави нас * от всякия нужды и печали.

Тропарь, глас 2:

Яко Господень ученик восприял еси, праведне, Евангелие, * яко мученик имаши еже неописанное, * дерзновение яко брат Божий, * еже молитися яко иерарх: * моли Христа Бога спастися душам нашим.

Слава, и ныне: Богородичен:

Вся паче смысла, * вся преславная Твоя Богородице, таинства, * чистоте запечатанной и девству храниму, * Мати позналася еси неложна, * Бога рождши Истиннаго: * Того моли спастися душам нашим.

НА УТРЕНИ

На Бог Господь: Тропарь. Глас 2:

Яко Господень ученик восприял еси, праведне, Евангелие, * яко мученик имаши еже неописанное, * дерзновение яко брат Божий, * еже молитися яко иерарх: * моли Христа Бога спастися душам нашим. [Дважды]

Слава и ныне, Богородичен:

Вся паче смысла, * вся преславная Твоя Богородице, таинства, * чистоте запечатанной и девству храниму, * Мати позналася еси неложна, * Бога рождши Истиннаго: * Того моли спастися душам нашим.

По 1-й стихологии седален, глас 1.

Подобен: Гроб Твой:

Апостоле Христов, и самовидче, и мучениче, * Иакове премудре, брате Божий блаженне, * верою празднующая честную твою память * свободи от обдержажших прегрешений молитвами твоими, * Небеса наследуй силою духа.

Слава, и ныне, Богородичен:

Купину, юже Моисей неопальну виде, * гору Божию, святой облак, сень нескверную, * Богоприятную трапезу, палату Высокаго Царя, * всесветлую и непроходимую дверь, * Дево, поем Тя.

По 2-й стихологии седален, глас 5.

Подобен: Собезначальное:

Ученик Словесе, Истины проповедник, * яко стрела послан был еси, * просвещая сущия во тьме лютей, святе апостоле, * и безбожия мглу отгоня от земли, * вся благоверующия сыны дне показал еси, * Христов видче, святе Иакове.

Слава, и ныне, Богородичен:

Иже упование на Тя, Дево Пречистая, * непреткновенное имуще, * покров суци от различных напастей и обстояний, * и бед лютых свободи ны, * молящи Сына Твоего со апостолы Его, * и спаси вся, воспевающая Тя.

Оба канона Октоиха, без мученичнов. И апостола канон на 6. Феофаново. Глас 4.

Песнь 1

Ирмос: Моря чермную пучину * невлажными стопами, * древний пешешествовав Израиль, * крестообразными Моисеевыми руками * Амаликову силу в пустыни победил есть.

Даянию благому, Иакове, и дару совершенну от Отца светов человеком подаются, учиши яве, Емуже причастится, апостоле, тя поющим помолися.

Светом просвещен, доблий, Божественнаго Духа и с Ним законы изложив, Церкви управлявши языков, яко Христов апостол, священнотаинниче всеблаженне.

Лик апостольский, всемудре, яве украсил еси, яко первый иерарх быв, самодейством Слова помазан яко ученик и брат Божий, священнопроповедник священнейший.

Богородичен: Источник Тя исцелений имуще, почерпаем, яко Источник рождшую жизни, Богородице Дево Чистая, и душ врачевство, и телес обновление.

Катавасия: Отверзу уста моя:

Песнь 3

Ирмос: Веселится о Тебе Церковь Твоя, Христэ, зовущи: * Ты моя крепость, Господи, * и прибежище, и утверждение.

Веселится о тебе колена Иудово днесь, Христовыми светлостьми виде тя светло облисташа.

Звезду Богосиянну Церковь язычная имущи тя, благославнаго проповедателя, и Божественным Светом озаряется.

Закон ты жизни Церкви Христове положил еси, Жизнодательным Духом ты законополагая и вещая.

Богородичен: Егѡже родила еси плотию, о Богомати, из Отца Возсиявшаго, Того, Чистая, Иаков яко Бога всех проповеда.

Седален, глас 8.

Подобен: Премудрости:

Сродник по плоти Иисусов был еси, * и от Него, апостоле, благодать многу приял еси * и всем преподал еси просвещение и разум, всемудре Иакове, * и идольскую лесь из корене исторгнув. * Тем, иже тьмы предстатели и лестцы, неправедно тя убивают, Спаса проповедающа. * Сего ради воишем ти: * моли Христа Бога грехов оставление даровати чтущим любовию святую память твою.

Слава, и ныне, Богородичен:

Солнца облаче разумнаго, * Божественнаго Света светильниче златокованный, * Нескверная, Неблзная, Всенепорочная Владычице, * омраченную душу мою ослеплением страстей, * безстрастия зарею просвети, молюся, * и оскверненное мое сердце омый потоки умиления, * покаяния же слезами и от тимения мя очисти дел моих, * да любовию зову Ти: * Богородице Приснодево, моли Христа Бога прегрешений оставление подати ми, * Тебе бо имею надежду, раб Твой.

Песнь 4

Ирмос: Любве ради, Щедре, Твоегѡ образа, * на Кресте Твоем стал еси, * и растаяшася языцы: * Ты бо еси, Человеколюбче, * крепость моя и хваление.

Ввел еси в море Твоя кони, апостолы, Спасе, и просветиша языки, к Твоему познанию привлекше, Владыко.

Нескверно, яко зеркало, явлься, и перводегельныя лучи Несозданныя Троицы известно прием, всем возсиял еси.

Валяемаго тя камня пророчество освященное зрит и сокрушающа прелести гнилое суетство силою Духа.

Богородичен: Вшед, о Богомати, во чрево Твое Превечное Слово, родивыйся из Отца неизреченно, Иакова апостола являет.

Песнь 5

Ирмос: Ты, Господи, мой свет, * в мир пришел еси, * Свет Святыи, обращаи из мрачна неведения * верою воспевающа Тя.

Ты, Господи, Свет, блистание Иакова явил еси светяща и земныя неведения и тьмы изменяюща.

Тя, Господи, гласом свободным проповеда праведный брат Твой, подражатель же страсти бысть, убиваем.

Кий земный ум похвал пения тебе принести может, добродетелей просвещенному благодатьми, Иакове.

Богородичен: Ты истинно Божественное обрет жилище, вселися, о Дево, наше спасение, Слово, промышляя.

Песнь 6

Ирмос: Пожру Ти со гласом хваления, Господи, * Церковь вопиет Ти, * от бесовския крове очищися, * ради милости от ребр Твоих * истекшею Кровию.

Одеждею законною облече тя лучшею и иерарха являет, Аарона древняго честнейша, иже милости ради в братство приемый тя.

Орган, действы ударяемь Духа, все помышление наслаждая и Богу привед спасаемья от работы лютейшия, был еси изряднейший.

Возжаждав, жизненныя испил еси воды, и реки источаещи Богоглаголиваго твоего чрева, текуция вселенней Божественным Духом.

Богородичен: Ева убо преслушанием смерть роди, Богородица же, Жизнь заченши, роди Нестареющуюся и древний за всех отдаде долг.

Кондак, глас 4.

Подобен: Вознесыйся:

Отчее Единородное Бог Слово, * пришедшее к нам в последняя дни, * Иакове Божественне, * перваго тя показа Иерусалимлян пастыря и учителя, * и вернаго строителя таинств духовных: * темже тя вси чтим, апостоле.

Икос: Рождение тя Иосифово, Иерусалима перваго иерарха, Иакове Боговидче, и Господня брата песньми похвальными воспоем верно и к тебе возопием: даруй нам дар совершен от Отца светов и отжени скорбь, настоящую от множества прегрешений, поднесоша бо врази на ны пяту и обступиша нас исмаильтяне, ихже сокруши вскоре луки, священноявленне, яко да тя вси почитаем, апостоле.

Песнь 7

Ирмос: В печи Авраамстии отроцы персидстей, * любовьию благочестия паче, * нежели пламенем опаляеми, взываху: * благословен еси в храме славы Твоя, Господи.

Яко в печи, на горнице просвещаемь Божественным пришествием Духа, таинственно, Богоглаголиве, возопил еси: благословен еси в храме славы Твоя, Господи.

Свыше дыхание зельное апостола языком огнеобразным вещати Божия величества устрои: благословен еси в храме славы Твоя, Господи.

Видения деятельнаго излагая дщицу, от скрижали же, яко духовныя, человеки научил еси: благословен еси, Боже мой, зовый, Господи.

Богородичен: Возсоздавый мир во утробе Твоей, Богоневесто, Божественнаго служения показывает совершителя Иакова, взывающа: благословена Ты в женах, Всенепорочная Владычице.

Песнь 8

Ирмос: Руце распростер Даниил, * львов зияния в рове затче, * огненную же силу угасиша, * добродетелию препоясавшися, * благочестия рачители, * отроцы, взывающе: * благословите вся дела Господня Господа.

Руце распростер крепкия, апостолы Твоя, Спасе, благословил еси, восходя, Владыко, к Безначальному Отцу Твоему, и устроил еси тыя с веселием вопити: благословите вся дела Господня Господа.

Якоже обещался еси, неложно апостолом Твоим Духа послал еси, Сего Иаков, Владыко, светлостию просвещаем, вселенную молниями просвещает яве и вопиет Тебе: благословите вся дела Господня Господа.

Мудрость, Иакове мудре, Ипостасную имел еси Учителя, учащу ты неизреченным и неизглаголаным тайнам, и к благочестию люди звати воздвигл еси: благословите вся дела Господня Господа.

Богородичен: Гору явленну мысленную, Дево Чистая, пророк виде Тя, из Тебе бо пречестный Камень отсечеса, спасая вселенную воистину, Божественно поющую: благословите вся дела Господня Господа.

Песнь 9

Ирмос: Камень нерукосечный * от несекомья горы Тебе, Дево, * краеугольный отсечеса, * Христос, совокупивый разстоящая естества: * тем, веселящися, Тя, Богородице, величаем.

Приидите, первопрестольника вси, Церкви светильника, священными, Иакова, песньми, яко иерарха и Христопроповедника, тезоименне праведнаго именованна, величаем.

Божественнаго общника, яко явльшася Безконечнаго Царствия, и Божия нареченна брата, и житием истинствующа, именование приемша, священнотаинника ты величаем, Иакове.

Престолу предстоя, блаженне, венценосец Троицы, верою почитающих твою память, нетлеющих насладитися честей, яко иерарх, Иакове, благоприятен, твоего Владыку умоли.

Богородичен: Ты, от Девы Рожденнаго неискусобрачно, Богоявленне, учении твоими яве чести Бога научаещи, Воплощенное Слово, в Негоже мы верующе ныне, достойно величаем.

Светилен.

Подобен: Духом во святилищи:

Яко Господня брата бывша, блаженне Иакове Богодохновенне, * вернии по долгу хвалим тя, * славяще светлую и всечестную, и светоносную твою память: * молися прилежно за чтущих тя.

Слава, и ныне, Богородичен:

Молитвенницу Тебе приводим и теплую Предстательницу, * Чистую Матерь Твою, вернии, по долгу: * сподоби рабы Твоя причаститися славы Твоея, и праведных части, * и сладости райския, и улучшить нам Небесное Царствие.

На хвалитех стихиры на 4, глас 8.

Подобен: Господи, аще и на судищи:

Господи, аще и на криле предста святилица Иаков, * но, дерзновением возопив, Бога Слова Тя проповеда, * Содетеля всех, в мир пришедшаго: * Егѡже молитвами и ныне подаждь просвещение душам нашим.

Господи, аще и древом глава апостолова сокрушена бысть, * но в раи древо жизненное ему дадеся * и, от привременных отрешився, вечно веселится: * егѡже молитвами Церквам мир Твой низпосли.

Господи, Тя исповедав на земли доблественне, брат Божий, * Сына Бога Вышняго, искренно приснопамятный, * злославныя враги посрами и укроти: * сего ради и пострадав, Тебе предстоит, радуяся.

Господи, аще и свергоша иудеи с высоты праведнаго, * но Небесных чертогов с веселием сподобися, * и в пищи наслаждения достойно веселится: * тем убо подаеши мир душам нашим.

Слава, глас 1. Византиево:

Во огненной зари Божественнаго Духа просветився, * благочестия явился еси Божественный ревнитель, * брате Божий Иакове. * Тем и одеждею тя законнаго священства, * яко Аарона древняго, честнейшею одея, * иже милосердия ради в братство тя приемый. * Того моли, апостолов похвало, * спастися душам нашим.

И ныне, Богородичен. Славословие великое, и отпуст.

НА ЛИТУРГИИ

Блаженна от канона апостола, песнь 3 и 6.

Веселится о тебе колено Иудово днесь, Христовыми светлостьми виде тя светло облистаяща. [Дважды]

Звезду Богосиянну Церковь язычная имущи тя, благославнаго проповедателя, и Божественным Светом озаряется.

Закон ты жизни Церкви Христове положил еси, Жизнодательным Духом ты законополагая и вещая.

Одеждею законною облече тя лучшею и иерарха являет, Аарона древняго честнейша, иже милости ради в братство приемый тя.

Орган, действы ударяемь Духа, все помышление наслаждая и Богу привед спасаемья от работы лютейшия, был еси изряднейший.

Слава: **В**озжаждав, жизненныя испил еси воды, и реки источаеши Богоглаголиваго твоего чрева, текуция вселенней Божественным Духом.

И ныне: Богородичен: **Е**ва убо преслушанием смерть роди, Богородица же, Жизнь заченши, роди Нестареющуюся и древний за всех отдаде долг.

Тропарь апостола, глас 2:

Яко Господень ученик восприял еси, праведне, Евангелие, * яко мученик имаши еже неописанное, * дерзновение яко брат Божий, * еже молитися яко иерарх: * моли Христа Бога спастися душам нашим.

Кондак апостола, глас 4.

Отчее Единородное Бог Слово, * пришедшее к нам в последняя дни, * Иакове Божественне, * перваго тя показа Иерусалимлян пастыря и учителя, * и вернаго строителя таинств духовных: * темже тя вси чтим, апостоле.

Прокимен, глас 8: Во всю землю изыде вещание их * и в концы вселенныя глаголы их.

Стих: Небеса поведают славу Божию, * творение же руку Его возвещает твердь.

Апостол к Галатам, зачало 200.

Братие, сказую вам, Благовествование благовещенное от мене, яко несть по человеку. Ни бо аз от человека приях е, ниже научихся, но явлением Иисус Христовым. Слышасте бо мое житие иногда в жидовстве, яко попремногу гоних Церковь Божию и разрушах ю, и преспевах в жидовстве паче многих сверстник моих в роде моем, излиха ревнитель сый отеческих моих преданий. Егда же благоволи Бог, Избравый мя от чрева матере моея и призвавый благодатию Своею, явити Сына Своего во мне, да благовестую Его во языцех, абие не приложихся плоти и крови, ни вздох во Иерусалим к предним мене апостолом, но идох во Аравию, и паки возвратихся в Дамаск. Потом же по триех летех вздох во Иерусалим соглядати Петра, и пребых у него дний пятнадцать. Иного же от апостол не видех, токмо Иакова брата Господня.

Аллилуия, глас 1: Исповедят Небеса чудеса Твоя, Господи.

Евангелие от Матфея, зачало 56.

Во время оно, прииде Иисус во отечествие Свое, и учаше народы на сонмищи их, яко дивитися им и глаголати: откуда Сему премудрость сия и силы? Не Сей ли есть тектонов сын? Не Мати ли Его нарицается Мариам, и братия Его Иаков и Иосий, и Симон и Иуда? И сестры Его не вся ли в нас суть? Откуда убо Сему сия вся? И блажняхуся о Нем. Иисус же рече им: несть пророк без чести, токмо во отечествии своем и в дому своем. И не сотвори ту сил многих за неверство их.

Причастен: Во всю землю изыде вещание их * и в концы вселенныя глаголы их.